

# Veles pra la Lia di Guanc dala Gherdëina

Nstadì se à i cumëmbri dla Lia Guanc dala Gherdëina de Urtijëi ancuntà pra si senteda generela. Cunsëi nuef



**Na muta cun la gherlenda spiza.**

**Lies** - Do la paroles de salut a na sala pléina de nteressei à la presidënta Brigitte Runggaldier Pallua, pra la senteda ai 9 de dezember, cuntà dla gran cumpéida de ativiteies dla Lia ntan l'ann 2009. I cumëmbri à fat pea pra

pruzescions, pra truepa defiledes te Gherdëina y pra vel' una oradecà, tla Val Badia y te Val de Faschia.

Da dedò à l cassier Werner Bernardi purtà dant la spëises y ntredes dla Lia ntan 1 ann 2009. La presidënta à pona dit che per gaujes persuneles ulëssela déju si ncëria. Nce la vizepresidënta Christl Moroder, la responsables di guanc dla Lia Silvia Thaler, Raffaella Rella y Zita Senoner à dit che les ulëssa se tré zeruch da si ncëries per gaujes persuneles.

## La parola al'autoriteies

L ambolt Ewald Moroder, che fova ènghè prejënt pra la senteda, à rengrazià la presidënta y la cumëmbres demisiuneris dl cunsëi dla Lia per si gran mpëni y lëur ntan duc i ani che les à fat pea pra la Lia y pra l cunsëi dla Lia, sotrisan la impurtanza che chësta Lia à per l mantenimënt de nosta cultura y tradizioni.

Nce la cunselliera Marina Demetz à abù paroles scialdi beles de rengraziamënt y lauda per duta la personnes che à laurà cun legrëza per l mantenimënt de nosc bel guant dala gherdëina.

## Cunsëi nuef

I cassier Werner Bernardi à dat

si despunibltà per fé inant pea pra l cunsëi dla Lia. La presidënta Brigitte Runggaldier Pallua ti à damandà ala personnes prejëntes ntan la senteda sce l fossa vel'un o vel'un nteressà o nteressedà a jì ite te cunsëi nuef dla Lia. Danter i prejënc iel unit adum de ndut 8 personnes a una de se mpeniè per la Lia y a jì ite te cunsëi. L se trata de Werner Bernardi, Sandra Comploj, Franziska Beikircher Prucker, Manuela Grönes Prinoth, Bruna Pitscheider Stuffer, Maria Christina Mussner Bernardi, Patrizia Ciechi Crepaz, Michele Fletcher Demetz y Maria Dellago.

La personnes prejëntes ntan la senteda ie states a una de lité la 8 personnes candidates coche cumëmbri dl cunsëi dla Lia Guanc dala Gherdëina de Urtijëi.

## Sandra Comploj presidënta

Ai 13 de jené se à abinà i cumëmbri dl cunsëi nuef dla Lia per si prima senteda. Coche prim pont sun l ordn dl di àn lità la ncëries nueses di cumëmbri dl cunsëi. Coche presidënta y scrivana ie unida liteda Sandra Comploj, vizepresidënta y responsabla di guanc dla Lia ie Franziska Beikircher Prucker, cassier resta inant Werner Bernardi.

Responsables di guanc dla Lia ie Manuela Grönes Prinoth y Bruna Pitscheider Stuffer, responsabla di cuntac cun l'Assoziazion Turistica ie Maria Christina Mussner

Bernardi, responsabla per l material fotografich y albums ie Michele Fletcher Demetz, responsabla per la prezentazion dla Lia tres internet ie Patrizia Ciechi Crepaz.

## L'atività tl 2010

Da dedò àn fat ora l program dl'ativiteies per l 2010, ulache la Lia uel inò fé pea pra la pruzescions de Juebia dai Andli y dl Rosar, pra la Gran Mëssa dla Segra y dla Gran Santa Maria ai 15 d'agost, pra plu defiledes, coche "Gröden in Tracht" y d'autra defiledes metudes a jì dala Lia dl Turism.

N proiet impurtant per l 2010 ie de jì cun la Lia Guanc dala Gherdëina de Urtijëi te internet, ulache n ulëssà musteré su la storia

dla Lia, la tipologies de guanc dala gherdëina cun uni pez che toca leprò y coche i vén trai séura, l program dl'ativiteies, cuntac y d'autra nfurmazions che à da n fé cun la Lia.

L cunsëi nuef dla Lia Guanc dala Gherdëina de Urtijëi ulëssà rengraziè duc i cumëmbri dla Lia per la crëta y prië bel duta la jënt de uni èta de Urtijëi de fé pea pra la manifestazions ulache n tira séura nosc bel guant dala gherdëina, per teni inant autes nosta tradizioni.

L program dl'ativiteies ti unirà parti ora ai cumëmbri dla Lia pernanche n saverà avisa duta la dates dla manifestazions.

*Patrizia Ciechi Crepaz*



**Patrizia Ciechi Crepaz.**